

## CARMEN DE LINGUA LATINA DISCENDA

Ecce incipis *ab ovo*  
hoc ex libro tibi novo  
novam linguam discere.

Lingua vetus est, antiqua,  
fama eius non iniqua,  
potes num quiescere?

Esse consors saeculorum,  
poetarum et scriptorum,  
sensus admirabiles!

En resurgunt ambulantes  
et nobiscum commorantes  
multi memorabiles.

Vide, Caesar Gallos vicit  
et *quousque tandem* dicit  
Catillinae Cicero.

Martialem, et Maronem,  
et Catullum et Nasonem  
*hic et nunc* meminero.

Ecce Dalmatae *Vulgata*,  
*Confessiones* post peccata  
Monicae dat filius.

Scribit Thomas et Albertus,  
Scotus etiam disertus  
*Summae* adversarius.

In Latinis multi clari,  
Marulus, Erasmus cari,  
Ragusinus Bošković.

Adde nomina praeclara  
in conciliis tam gnara,  
Strossmayer et Stojković.

Multi multa iam dixere  
et in libris condidere  
flores sapientiae.

Lege, collige, edisce,  
*utile cum dulci* misce,  
instruunt sententiae.

Memor esto linguas multas  
huius Matris esse excultas  
lacte atque sanguine.

Vultum eius tu cognosces  
ubicumque id si posces  
in linguarum agmine.

Tamen Mater profitetur  
et fuisse confitetur  
mirum suum speculum.

Quo se totam exornavit,  
pulchrum caput coronavit,  
fulget sic in saeculum.

*Felix culpa* Romanorum!  
Vis invicta captivorum  
hosti artes intulit.

Et si sapis res Latinas,  
sapis quae ut medicinas  
homo apis contulit.

Nunc *ad rem* est nobis ire  
praeceptaque exaudire  
quae sunt necessaria.

Multum tibi est legendum,  
multum erit repetendum,  
si vis scire varia.

*Quidquid discis, tibi discis,*  
discens, nota, concupiscis  
semper plus, mehercule.

Esto fortis, noli flere,  
multi Linguam didicere,  
cur non tu, discipule?

**Zlatko Vidulić**